

四庫全書

集部

欽定四庫全書

御定歷代賦彙卷二十七

地理

五湖賦

有序

吳楊泉

余觀夫主五湖而察其雲物皇哉大矣以為名山大澤
必有記頌之章故梁山有奕奕之詩雲夢有子虛之賦
夫具區者揚州之澤藪也有大禹之遺跡疏川導滯之功而
獨闕然未有翰墨之美余竊憤焉敢妄不才述而賦之其辭曰

濬矣大哉於此五湖乃天地之玄源陰陽之所徂上值箕斗之精與雲漢乎同模受三方之灌溉為百川之巨都居揚州之大澤苞吳越之具區南與長江分體東與巨海合流太陰之所必玄靈之所遊追湖水而往還通蓬萊與瀛洲爾乃詳觀其廣深之所極延袤之規方邈乎浩浩漫乎洋洋西合乎濛汜東苞乎扶桑日月於是出入與天漢乎相望左有包山連以醴瀆峯竒崔嵬穹窿紆曲右有平原廣澤蔓延旁薄原隰阪各有條格

如蘆荑薊隱軫有錯銜風之所去零雨之所薄

洞庭賦

宋夏侯嘉正

楚之南有水曰洞庭環帶五郡森不知其幾百里臣乙酉夏使岳陽抵湖上思作賦明目披襟而觀之則翼然動足然跂慄然駭愕然怡恍若駕春雪而軾霓浩若浮汗漫而朝躋退若據泰山之安進若履千仞之危懵若無識智若通微跛若不倚蹌若將馳耳不及掩目不暇逃情悸心嬉二三日而後神始宅氣始正若此不敢以

賦為事者二年然眷眷不已一日登崇丘望大澤有雲
宰兮興歎兮止興止未霽忽若有遇由是漬陽輝沐芳
澤覩一異人於巖之際霞為裾雲為袂冰膚雪肌金珎
玉佩浮丘羨門斯實其對因言曰若非好辭者也臣曰
然然則若智有所不通識有所不窮用不通不窮而循
乎無端之紀若得無殆乎臣又曰然然至極則物應思
精則道來嘉若之勤無譁無談吾為若稱云太極之生
曰地曰天中含五精五精之用而水居一焉水之疏適

則為江兮遠則為河積則為瀦兮總則為湖若今所謂
洞庭者傑立而孤廓然如無區其大無徒含陽字陰元
神之都曖曖昧昧百川不敢逾有若神者有若賓者有
若僕者有若子者有若附庸者有若娣姒者有若禹會
塗山武巡牧野千出百會咸處麾下每六合澄靜中流
迴晚莽莽蒼蒼纖靄不翳太陽望舒出沒其間萬頃咸
沸彊而名之為巨澤為長川為水府為太淵縱之不踰
跼之不卑乍若賢人以重自持誘之不前犯之愈堅又

若良將以謀乎邊澎澎濞濞浩爾一致又若太始未有
仁義沖沖漠漠二氣交錯又若混沌凝然未鑿此乃方
與之心胷溟海之邪廓也三代之前其氣濩落浩浩滔
天與物迴薄滅木襄陵無際無廓上帝降鑒巨人斯作
乃命玄夷授禹之機隧山堙谷滌源暢微然後若金在
鎔若木在工流精成器夫何不通是澤之設允執厥中
既與其性遂得其正有升有降有動有靜臣應之曰升
降動靜可得聞乎神曰水之性非圓非方非柔非剛非

直非曲非玄非黃畫象為坎本乎羲皇外婉而固內健
而彰降以姤始升以復張其靜處陰其動隨陽六府之
甲萬化之綱式觀是澤乃知天常若乃四序之變九夏
牧處烘然而炎沸然而煮羣物鴻洞爍為隆暑澤之作
頎然其容若去若住若茹若吐靈趨怪覲杳不可覩蒸
之為雲散之為雨倏忽萬象如還太古真可嘉也若乃
秋之為神素氣清泚肅肅脩脩羣籟四起澤之動黝然
其姿若挺若倚若行若止與宮離離為之騰風蒼梧崇

崇為之供雲四顧一色黯然氤氲其聲瀾瀾若商非商
若徵非徵東溱海門一浪五千里又足畏也言其狀則
石然而骨岸然而草氣然而榮降然而脈有山而心有
洞而腹有玉而體有珠而目穹鼻孤島呀口萬谷臂帶
三吳足跬荆巫或企然而望或翼然如趨彭蠡震澤詎
可云乎臣又問曰澤之態已聞命矣水之族將如何居
神曰大道變易或文或質沉潛自遂其類非一或被甲
而漣或曳裾而仵或禿而跋或角而蜿或吞而呀或呿

而牙或心以之憊或修以之暇或脩臂而立或橫鶩而疾或髮於首或髻於肘或儼而莊或毅而黝彪彪玢玢若太虛之含萬彙各脩其生而合乎羣者也臣又問曰若神之資其品何如也神曰清矣靜矣麗矣至矣邈難知矣肇於古古有所未達形於今今有所未察非希非夷合其心於自然然後上天入地把三根六況水居陸處夫何不燭彼鯢鯢之賢轡龍之仙乃吾之肩也其餘海若天吳陽侯神胥齟齬而遊曾不我儔臣又問曰易

稱王公設險是澤之險可以為固而歷代興衰其義安
取神曰天道以順不以逆地道以謙不以盈故治理之
世建仁為旌聚心為誠而弧不暇弦矛不暇鋒四海以
之而大同何必恃險阻何必據要衝若秦得百二而帝
齊得十二而王其山為金其水為湯守之不義歟然而
亡水不在大恃之者敗水不在微怙之者危若漢疲於
昆明桀困於酒池亦其類也故黃帝張樂而興三苗棄
義而傾則知洞庭之波以仁不以亂以道不以賤惟賢

者觀之而後得也於是盤旋徙倚凝精流視罄以辭對
倏然而晦

洞庭賦

有序

明 廖道南

夫靈飛之曲神人所詠歌也白雲之謠僊姥所贈遺也
宣玄機於古調泄天巧於元聲雋永優柔溫醇曄緩是
以黃鳥嚶嚶伐木之義興焉白駒皎皎東芻之愛形焉
迺若洞庭君戴切雲之冠翳承日之華窮深致遠極幽
析微卑典午之三謝陋建安之七子脫其近習超於太

始庶斯文有託吾道不孤也已爾其辭曰

善天地之渾噩兮先五行而乘氣機列津潢於躔舍兮
騰霄震霖而滋濡迺潤下其濫汙兮象左旋而東注莽
困遼之聚潏兮西大海乎天之宇繫君子之體物兮習
重坎而需允澤潏咸池之決瀼而滴渤兮濬濊汜之溷
渚羨五湖之浸具區兮揚靈乎三江而權之震澤潏盪
其縈洄兮洞庭濯潏以神俛望崑崙之建霞標予零穹
窿之空翠峰縹緲而巔岿兮瀆扈練其渙萃泉白雲之

繚繞兮洲明月乎余將征狎鷗鳥於前汀兮鳴朱鴈而
嘯玄鯨驅河伯使負舟兮叱陽侯使回楫江妃海童絡
繹余後先兮萬靈皛皛其剌剌擎扶桑之翹英兮藹建
木其如雲吸陽精之沆瀣兮瑤膏玉蕊碌碌而繽紛友
偓佺於玄圃兮招馬師皇於流洲謁東方君於暘谷兮
駕應龍其蚺蜺爾乃辭閭闔之貝闕兮抗軒轅之瑤旃
曳芙蓉之霞裾兮舞羣鵠而遊鈞天招太一於紫宮兮
卧都房以終日寂閒寥寥其緬藐兮名不知予之所極

重曰造化莽眇吾何求萬形生滅奚可留往者傳舍來
綴旒俟河之清祇增憂東方煌煌三五收日中見斗河
漢流終風且霾啼鵲鷗鳳凰竄伏陰巖幽我歌洞庭阻
且脩君子崇德令名悠於胥樂兮為好仇

汎彭蠡賦

有序

明

李夢陽

正德六年夏五月李子赴官江西南道彭蠡之湖作賦
曰

仲夏滔滔兮湖水洶湧戒艤舟而逆進兮志定意恐朝

發湖口兮巉石纜牽檣帆午張兮陵急洋而縱船洪滂
吞吐兮杳莫界際浚漫瀆洸神精搖兮浪起伏而來曳
曩余誦夏記與鄜經兮識彭蠡而心慕繁廩水集流夥
兮挾十州川而北注合岷江東之為東江兮脅揚吳而
騰海包敷淺而瀦之兮撼匡廬而使改惟據巨者附斯
衆兮滿之者驟必溢彼何怪弗之潛兮抑何摧而靡殛
射者萬鼓之千兮叢谿壑之湊趨彭蠡崩以箭疾兮勢
嶽頽而電舒匯莫究始兮散孰察其終龍蛇逐之何載

兮至今寤而以宮祈之錫嘏兮侮之掇菁怒之風雷愉
之霽兮亦厥靈之攸逞潮峯客以陬閏兮條當晝而忽
陰上下既顛置兮孰又辨昕昏與北南睇衆山之劍攢
兮爭負高而竟降關膏麓之淤澱兮奄焉墊而為江緣
木末而巢室兮民浮居而舳艫悼隻雛之寒嘯兮寂祗
濱而守衆亂左蠡之沸沸兮壯康郎之浩汗濤沃日而
明暗兮巒島渚而渙散濶已俛而復昂兮渦湓潏而接
連瀧無風以橫飛兮潭澄渟而布漣龍夭矯以戲瀨兮

粵嶠汎而吹沫荒洲湯之昧昧兮魚鱉貫而鱣鱖具區
洞庭方余不暇兮懼九圍混而黝冥苟清濁軋其瀕瀕
兮聖愚一而泯靈胡弱草丹而華兮反泓棲而矜彩鳧
訖龍鬚兮蘆蕪菰繁其被汀兮紛振翰而雲駭彼陽鳥
既遊兮鵲鵲嘻而專已鷁水馬以闔扉兮蛤又濡珠而
曝殼詭殊錯以跳踉兮有曲牙而鹿其角既逆鱗而返
舌兮復獮首而象鼻汙鉞尾而戟鬚予族氍毹乎瀟瀟
誰非含生而願遂覩彊柔之閭濟兮唾陽侯之懦怠縱

鯀鼉之恣肆兮甘失職而蔓災虞坤漏而陸沉兮儵一
歎而三泣蜮吸颺而排沙兮時負渚而人立濺雨迸而
冠岫兮岸衝攔而壑落詫妖詭之多態兮魄撼促而心
愕瞬兮異覲恍兮變索究之諒奚以兮聊戢櫟而遊淫
夕景掣以波下兮石鐘礚礚而竅吟追三苗之即叙兮
亶文命之訖敷彼九江未之殷兮余誠憂鬼類之聒呼
迺橈人之罔諳兮祠九首而丐邪愚者吾靡疵兮鄙明
賢之用頗景神姦之勒鼎兮數歷誰弗竟危魍魎支祈

倔強伺間兮憐臨湖而嘯悲

震澤賦

明朱右

客有鄒陽生號遠遊公子倣儻瑋瑰超竒拔偉衣白雲
之翩翩我危冠之韡韡神怳怳以欲逸風飄飄而凝佇
於是上會稽探禹穴訪遺蹤超洞壑軺車前驅輜重紛
錯王子進之以笙鶴江令贈之以芍藥邇乃揚颿錢塘
鼓楫中吳將欲窮覽山川壯遊江湖造松陵主人而驩
然從予主人曰子號歷覽亦嘗聞澤藪之大有三萬六

千頃者乎生曰未也可得而聞與主人曰唯唯夏曰震澤周曰具區下屬三江實為五湖右接天目宣嶺出溪之原左通松婁中江入海之如衆流之委羣利之儲若溪出其南溧水經其西五灣瀦其東垂虹界其隄流甘泉之清液隱雷灘於北隈洞庭中起林屋天開渺彭蠡吞雲夢駕雷夏軼孟諸杳不知其幾千里之為遠疇能計之三萬頃而有餘其澤則汪瀼浩汗洶涌澎湃瀰漫津渼渙渙汙汙流飈吹波結絡龍鱗日光玉潔澄泣網

縕清瀾凝漪錦花成文浪濤噴瀆澎湃鄰出雷騰虹
蒸雨生雲呼吸陰陽吞吐乾坤如潮汐之不測或早暮
而異觀飛揚蕩薄迅復汨淪千態萬狀不可殫論其數
則碧沙曼衍黃石砮砮莎薛蒹葭白蘋青蒲荇片蘊藻
芡菰荻蘆蔓菁杜若茝離靡蕪芡實雞頭草長龍須艾
荷翠沃蓮藕芬粵衆物居之何可勝圖其土埂則塗泥
微露埤濕就乾歲荇蘆蒿茝芷蘅蘭菖蒲馬荔荃蓀射
干圻楊絮白水柳葉丹蘋蓼早綠榆楓暮殷朱橘火齊

黃甘金九連枝並秀駢集乎其間爾乃周流梗概溥覽
爛斑兩兩相峙鬱乎崇山其山則層巒崑崙疊嶂嶙峋
岑竅參差如陵如墳崔嵬齒萃陂陀糾紛上拔仞岡下
臨渚瀆控地軸以旁礴逐水曲而折旋馬跡屹立以疑
疑翠峰峻拔以盤桓夏浮雲之流景俯蛟龍之深淵空
谷谿斫以無底磴道蜿蜒而相連其中乃有奉真之祠
供佛之堂琳宮道館梵宇禪房煙雲縹繞金碧焜煌黃
冠緇衣往來而尚羊談玄讚空學幻言咙或高堂以演

玄或擊鮮而稱觴駕白魚之飛艚泝重湫之流光水產
則黏蠔旋螺土蛤石花鮐鱧鯽鯢鰈鰻鮓鮓鮓鮓鮓鮓
頰尾之魴細鱗之鱸紫甲之蝦稻蟹盈尺巨龜專車長
蛟潛鱣穹龜靈鼉周游涵泳其樂無涯羽禽則晨鵲莊
鷄鵲鵲鳬鷺交兼鵲鵲鵲鵲鵲鵲鵲鵲鵲鵲鵲鵲鵲鵲
駕鵲遠舉鷗鷺忘機王睢並鷺屬玉交飛振翮刷羽以
教以嬉來如雲集去如煙晞若乃絕岸之濱漸水之石
或伏或倚或卧或立或方如珪或圓如璧或矗如峰巒

或平若几席或滑如肱肪或廉若劒戟或赭而赤或蒼而碧或縞如玉或黝如漆為中流之底柱若逆河之碣石怪怪奇奇熒熒礫礫斯又天造之神工而出於茲水之蕩激也思昔夫差競霸圖勲鏖戰於此勝負未分旌旗蔽空舳艫如雲始魚鼈以為樂終麋鹿以成羣迺若歸釣之徒著書之士去國鴟夷汎舟西子亦復眇眇滄波茫茫白水主人之辭未終鄒陽生庸乎改容喟然而歎曰甚矣世道逾下而人心之不古也吾子好學頗識

典策不述職方之經邦而盛稱茲澤之庶殖不思禹蹟
之胼胝而徒歎英賢於戰國皆非所以極遊覽之願望
而擴夫五行之至德也遐思往古擊節太息請誦主人
所聞而陳子所得烏庠噫嘻浩蕩方割懷襄未平九域
混而莫辨百潦壅而不行支祁崛強於淮甸天吳披猖
於海溟時維茲水震蕩靡寧溇溇洶洶若轟轟疑撼
天而動地猶駕雷而鞭霆類不周觸而天柱折若巨鼇
抃而洲島傾斯震澤之所以錫名也迨夫九載既南庶

土交正波神受職川后奉令應龍畫地以効功庚辰持
戟而制命導吳淞以安流別淮海而表境於時澤安其
所水順其性鳴者自停動者自靜斯震澤之所以底定
也千載而下美哉禹功昏墊之害既遠灌輸之利無窮
故漁人舟子之出入豪商薄宦之經從擊楫鼓浪引帆
隨風莫不連檣接舳往來乎其中斯又具區之數所以
出萬民惟正之供也方惟海寓清明朝廷寧謐內宣民
化外修貢職農安其耕女効其織工習其業商估其直

士守遺經民食餘力風不揚波水不濫決方鎮以寧土地壑闢開禹之疆廣禹之績是以九州之外咸仰聖育沾濡乎仁義涵泳乎道德浹洽恩波沐浴膏澤漸摩浸潤流行洋溢天無亢燥之災人樂沃土之俗試言其故則辟雖湯湯聖化行矣靈沼洋洋聖澤汪矣御溝溶溶生意茫矣溥德川流達要荒矣下視一隅寧不隘杯水於坳堂矣主人於是聳乎樂聞憮然自失仰神功之長存慨餘子其何益相與鼓枻乎滄浪曾不帶芥於胸臆

迺起為詩歌以頌德詩曰於赫禹功配天比隆生我遺
氓宅我土中原隰昫昫江漢為東萬世永賴維禹功是
崇於皇禹德立我民極手胼足胝救焚拯溺鑿井而飲
耕田而食靡謝天功焉知帝力於昭太上示民以應眷
佑我皇與民立命開禹疆土繼禹作聖其混合四大維
民之正於穆聖皇維上帝不常敬哉有土疊疊弗敢康
五嶽四瀆七澤九岡罔不修其職來享來王來享來王
受天之祜於萬斯年朕我有土有土有民有子有孫有

引勿替以頌茲文

珠湖賦

有序

宋崔公度

高郵西北有湖名甓社近歲夜見大珠其光燭天嘗問
諸漁皆言或過於他湖中有竊謀之者則風輒引船而
去終莫能至賦曰

萬物之精上為列星其在下者因物而成形故在天下
之偉寶不妄其所託託物之主實內鍾乎神靈吾嘗臨
東海旅南溟汎江淮之湯湯濟岳陽之洞庭觀其溶液

衍裕蓋天地之委藏祕怪怳忽蛟蚪崢嶸豈世人之敢
指名哉若乃雲夢震澤浮梁合浦獸潛宮亭神見牛渚
直湘沅以南浮懷涇渭而北顧導東而成滄浪激西而
為灇潏延平誕竒漢臯殊遇率傳載之雜出為異物之
所處或設限於藩服或効琛於王府鑠高郵之經治裂
揚州之故部有湖隸旁將三千所大或萬頃小亦千畝
迤邐兮聯絡參錯兮駢布由卑以自處傾十數州之羨
沃窮山大野谿谷原藪晝夜走險越千里而來赴者蓋

十六

麗觀矣瑰祥恢怪庶幾乎託焉間乃省貢書考圖編所
陳者特盤餐之微固不聞有把握之貴為當世之所傳
發詠乎川珍翱翔乎水邊爰有蘆人漁子相語而來前
曰先生之念者貨也若夫川澤之精理則不然不寶於
人獨寶於天今此有夜光之珠產於深淵我意其神先
生辨旃其始也天和景晴湖波夜平煙冉冉以四收萬
籟息而無聲則是珠也凜若干將之氣海月之升含彩吐
耀周隅皆明呀紺石而為宮被綠苔以垂纓挹奔星之

光芒吸沆瀣之精英木散影于扶疎草露實兮紅青林
鳥驚而移枝羣犬愕而爭鳴於是印人徐呼上流俱起
撫鴻置以先趨領冒筭之已試連徽挺义灑網扶耜嗟
雖鑒其晷曉疑未曉其機器方詭智之漸張果造形而
已逝而況伏見靡時歟彼倏此與蛟龍之為朋會風雨
而作衛彼能三足而在蘖鼈九肋而充饋漢蛟鮓之青
骨鄭鼃羹之異味勅牛悅水而黃奪澤馬翫繩而足蹟
犀狎獨而解角翠因媒而折翅江使被執於行役巨魚

為腊於貪餌文貝璆瑁出禍其腸腹金華玉英坐窮於
淘絕蠟蜃胎寒熠燿自喜狀絕意於避引適足殺其軀
而已矣是故號數選者我固謂之貨也能不為珠之笑
邪子曰嗚呼噫嘻信乎言也既明且哲則大雅君子者
邪不常所居擇利害而去就者邪用以晦明知在已者
邪色斯舉矣學孔子之徒者邪薄泥塗而不辱不恥下
賤者邪川不涸岸不枯有德鄉里者邪久之不聞其遯
世者邪既而復曰嗚呼噫嘻照魏王之乘邪燭隨侯之

室邪謂上幣邪飾冠冕而佩邪客有聞者亦瞿然而興
曰嗚呼噫嘻吾聞諸石室之書云王者得之長有天下
四夷賓服然則得之者或非其心獨王者之心邪

游東湖賦

宋張耒

紛不知吾之所如今獨漫漫而若狂乘醉飽之餘力兮
遂陟嶽而緣岡惟嚴冬之栗烈兮莽川澤之茫茫農功
休乎場圃兮平陸散夫牛羊憫大木之百圍兮慘赤立
而無裳鵲鶴羣鳴而上下兮雜篁竹之青黃忽平陸之

既窮兮漸積水之汪洋曰是為齊安之東湖兮右派合
乎濤江荒灣寂寥而葭葦兮懸流冒乎夕陽為舉網而
無獲兮嘉魚逝而洋洋弔林落之柴荆兮哀淮夷之阻
荒呼徒侶吾還歸兮陰風振而塵揚畏星昴之將中兮
冒玄夜之飛霜顧謂童子汝其賦詩爰有小子褰然致
詞歌曰歲窮木落兮大澤空鴈宵征兮天北風曷不飲
酒兮御玄冬歸來歸來兮樂未終余曰汝姑置之乃歌
曰臨山川兮懷故鄉歲窮陰兮晝不暘升高堂兮潔余

樽耿余思兮古之人

南湖賦

元 陳世昌

禾城之南有積水焉界吳越之土疆直斗牛之星躔雖
川浸之不侔亦泛濫之所先挾地勢之爽塏匯清波之
淪漣紛纚纚其來屬咸增奇而效妍若乃其源委也則
天目之崖茗霅之溪東會吳淞西撫禦免支流旁達聯
絡相繼以灌以漑以遂夫土宜其南則長水之塘爰山
之鄉出硤石道海寧岸絕兮望洋其北則杉青之閘平

望之亭表裏湖江并包濁清衆流之趨混浩浩以達於
滄溟其上則有良田衍沃灌木叢泓麻麥夏熟秔稌秋
登溝塍綺錯原隰縱橫蔬圃之利瓜芋薤菰蘆菹茄莎
實繁有生其中則有萑蒲葭莢澶漫渺瀰紅蕖濯錦翠
荇牽絲菱生而紫角爭奮芡長而紅頭欲齊玉截肪而
無玷珠脫蚌而未累可以續食代飽為木蓴之珍奇魚
則鰣鯉鰕鰕鯉鯽鱖白小羣鮮雜以蜆螺網罟相求
泌渚交加霍如霧散倏爾雲遮或鱗甲璀璨或鬚鬣

髣或貴列鼎俎或賤比泥沙以得之而厭飫恒家益而
戶夸鳥則鴛鴦鵲鳬鷺春鉏羣娛競沒去曉來脯起
如飄風泊若浮壺逶迤汴渚唼喋菰蒲矰弋之所止且
若乃時雨降川澤盈春流汨其乍起綠波豔以鱗生於
是淑景布麗微風扇和青莎緣堤虹梁跨坡都人士女
往來娑娑列綺席間清歌揚桂楫浮綵舸以樂時雍既
麗且都又若潦水盡寒潭澄天翳絕湖鏡平望顏陽之
西下見明月之東生漁歌互答水調淒清輕艫短櫂比

渚連汀實豫且之攸樂匪伊人之所恒別有浮屠之宮
號為真如孤塔岌堯仰攀雲衢俯瞰川陸渺漭縈紆巨
浸涵其表遙峰峙其隅極南湖之壯觀攬秀色而無餘
有唐名臣實為風氣之所聚亶乎昱而光新凡湖之美
盡是而不乏所陳矣嗚呼噫嘻惟昔春秋敵國初讐夫
差勾踐各奮其謀疲民以逞暴骨為丘槁李敗師甬東
使居越不為僂吳其治乎然則是水固嘗閱前代之興
亡鑑當年之成敗洗干戈之污蠱復民生之凋瘵語其

量一勺之多語其用五行之大豈真涵煙波浮藻采狎
遊觀資玩愒而已哉客有謂賦者曰洞庭彭蠡之水天
下之大者也子不是之求而獨甚譽於茲水不已過乎
予曰不然人情忽於所近小大各有攸當是故鵬鵬扶
搖萬里而斥鷃亦自足翱翔泰山之高千仞而不能有
加於毫芒莊生所謂目擊而道存隨寓而無方者也亦
奚病哉乃為之歌曰南湖之清兮可以濯纓南湖之上
兮聊寄我情地之勝兮獨不以人而後名後千載兮亦

有慕其遺聲

汾湖賦

元陶振

釣鼇生朝發跡乎東海久將抵乎西都過汪洋之大澤
勢滔涵乎太虛以為洞庭邪則層樓不見翬飛乎黃鶴
近山不見翠列於蒼梧以為彭蠡邪則瀉不見銀河九
天之瀑布而張不見屏風九疊之匡廬於是東覽三泖
西瞻具區然後知其為三吳之巨浸名所謂汾湖者歟
是時也日落蒼灣煙澹平蕪恍東山之月出遇鄰舟之

老漁停桂櫂而揖余言曰吾將告子以汾湖之所以得名衍子以汾湖之大義子亦樂得而聞之乎是湖也兩界中分南北無虧其南也則千緦之無盡其北也則百弓之有餘故其南半為嘉禾之境其北半為松陵之墟湖之得名其以是歟故老相傳信而不誣原其始則具區之溢出而旁匯乎此潏然亦安知其不濫觴乎崑崙之頂泄瀚海而來尾閭者邪乃若微波不興一碧萬頃如青銅之淨拭似白練之平鋪颼風倏起長鯨怒呼拔

銀山之千尺卷驚濤之雪如使觀者不覺心戰而膽慄
頃刻碎行人之轆轤其產則辛夷杜若菡萏珊瑚大貝
之寶明月之珠春水桃花之鰕秋風蓴菜之鱸白蘋奪
淮西之風味紫蟹剖吳下之膏腴又有魚鱗之屋水晶
之居其源莫測其奧莫窺構波神之窟宅瞰馮夷之幽
都月白風清似或聽廣樂鈞天於縹緲雲消雨霽恍若
見金支翠旗之有無既無凌波之仙子豈無騎鯉之仲
夫玉宇生涼則足以稱純陽飛劍之渡綠雲曉漲則足

以供漢陰抱甕之斟散落霞錦光於蕩漾濯殘陽紅纈
於扶疏昔杜少陵空有漢陂之樂曾不及此一覩李翰
林空有郎宮之汎曾不及此一窺故凡游乎此者自有
以得其樂又何必渡黃陵而遊赤壁隔滄海而望翠蓬
與冰壺也哉雖然此特論其槩耳若夫地靈人傑同德
相符則有陸龜蒙之名裔陶弘景之後徒天游子學貫
乎載籍六一翁道究乎精麤雲樵先生之磊落采芝逸
士之清臞是數公者莫不韜光於草澤混跡於樵漁披

羊裘於風雨恣綸竿之卷舒一棊不肯却淝水之戰一
箭不肯射聊城之書仰高名於辭漢之嚴子慕清風於
去越之陶朱悉能葆清光於治世處高明而不污吾嘗
品其人南州高士之列孰云誕而為迂若是則今之汾
湖不獨有異方奇物之產神仙巨靈之宅抑且為浙中
人物之淵藪東吳學海之歸墟也語畢老漁鼓枻波間
倏忽而去飛玉龍之聲卷驚濤於別浦折風木於太湖
八百之西灣不覺七十二峰翠鷺之掀舞紛落葉之相

觸灑蓬牕之急雨起而視之則時夜將半雞三鳴更四
點月已墮海西丈五矣於是叱湘妃捧硯命洛神展素
援長杠大筆於青天挹蟾蜍九秋之清露想老漁所述
之前言而遂寫為汾湖之賦

西湖賦

元
白
珽

杭之有西湖不獨如人之有省目也如楚有金如蜀有
錦人得貴而玩之也凡水在天地間由山而出由地而
受為里合萬有六千奚止此水可誇絕於天下哉顧一

州一縣理所在水之東者皆西湖也。穎有之松，有之山，陽四明，類有之。獨在杭者，齒響諸夏，筆騁羣彥，是蓋有明珠玉樹，不待斲而成；大圭圓璧，不待縑而貴者矣。是湖也，發源南北之諸峰，而風氣蔓延乎東州之列岫，近而秦望，遠而桐扣，左龍飛之兩乳，右鳳凰之孤唼，勢將合五州之芳澤，集萬山之鮮溜，豈惟武林之一泉能專此江北江南之秀原夫，竒狀天造，勝境人為，古稱圖畫之如則，陋今曰蓬萊之山，亦非若欲知三歎望洋之盛。

當不憚發一覽衆小之危悵天地之尤物何簡牒之偶
遺於鄴侯之六井獲肇見於唐碑盪海濱之渴鹵弭疾
屬於羣黎今衍之而為井十或通貫乎園池繼崇隄而
節水將下塘而注陂羌運漕而達河亦溉旱而涵瀾澤
及田疇之廣乃繼聞於太傅之記辭錢氏置千兵而設
撩陳氏述古資衆僧而繕治既大脩於蘇公樹三塔於
中流橫六橋於長隄復繼志於趙侯與憲擴波光於板
日續麴院之一支亭館日增而月益崇築前規而後隨

此特表其人為之序迺以見夫天造之機南北兩峰亦有祠宇譬之龜蒙為望於魯皇妃保叔雙擎宰堵截羣峰之駿奔為西湖之門戶冠之以南屏襟之以赤土宮其濬以致齋圃其墟而閱武煙霞乍舉白雲不去金鐘無聲玉岑有數鷗雞延為向背靈鷲行為胥附五峰指列乎虎林三竺駢羅乎玉女按駝巘而巾子巍如帶東山而石甃酷似在水中央孤立一嶼遼鶴不來處士誰與辛庾梅之猶昨惜陳柏之非古由四刹負鼇而徙成

太一祝釐之所復有寶蓮瑞石遠映胥山之輔金地已
寶翠丸丹柱寫影乎水滸凡此前後聯絡復多嶺鴈葛
公已往而丹井不改仙姥既去而慈雲如故二麥當風
篁之衝臙脂割黃泥之據萬松東接乎宮垣棲霞南沿
乎岳墓紫坊鐵冶石人大青之儔散不計其在處中有
水竹青芝法華大悲桃花瑞岡之相背巢溝龍駒之並
馳詠吳王之楓木表金姬之楊梅抑不過因人煙之所
聚曾不若朱野葛陂之得人而奇洞則有龍泓香林木

樂石屋呼理公之白猿避里人之蒼蝠煙霞乾濕二洞
往往剎巖而嵌谷雖形勢之或列皆所以發湖光而增
山淥水石井潭澗谷實繁釐為十八合為一源濯惠因
之滄浪弄金沙之潺湲冷可洗耳甘可滌煩禱白鱖而
祠烏龍記水魚而碑靈鰻限玉為池跳珠為軒香山六
一參寥東遷各井其井各泉其泉終歸乎一萬頃之湖
天若他園池樓觀佛宮仙宇辯口不能殫其名巧慙不
能知其數余固拙於言辭始槩陳其洩露尚慮齊人不

知有稷下但丘徒知有管仲晏子湖詠維百先言御園
爰有聚景圖經所尊致坤宮之孝養據震位以生蕃來
四朝之游幸攬衆逸以平吞南有翠芳蘭棧在焉接蓬
萊於中沚賓憇日於前軒北有玉壺紅鵲尚存創於廊
王隸於慈元去環碧兮百權隔水月兮一垣慶樂有梅
關桂林之勝珍鳥異獸之繁高連棟為十錦碑蝕苔以
千言記南園之絕景扁西湖之洞天此皆始屬於禁籞
又不但嘗錫之侯藩次則仰真珠之高寒聽水樂之聲

在雲洞居下湖之左古柳列昭慶之外得萬景之天全
擅九曲之紫翠總宜盡晴雨之奇養樂集雕鏤之藝梅
岡斑衣擇勝秀野藹梅坡之綠陰送花家之紅靄尚名
苑與勝圃滋角奇而闢異壘不知其幾百十所所可言
者特言其最堂則有德生溥泳飛之仁依光覺貪濁之
迷偉觀興頑懦之志湖山廣壽樂之基二賢先賢序列
一隄表義夫節婦三十九人之樂石儼大人君子千載
一心之令儀閔雪江之講肆寒氷壑之書帷隱居思真

玉連翠樾九師有美尚可按跡於品題亭稱冷泉旁連
壑雷上有天香下有客兒花光巧於公輸通玄掩於招
提春雨為觀香月為鄰水竹院落無邊風月見天地心
以總之池有湧金金牛白龜瑤池白洋分占湖之四涯
林塘之鑿花徑之構各擇其地各揭其楮非窺園則莫
知禮重崇報有國所祠夏禹據城隍之堞神胥峙輦道
之陴旌金祝之奮忠慨朱蹕之蹈危嘶府君之神馬游
宰相之白衣海州死節鄂國錫圭傳唄林於霍山之淖

薦菊泉於嘉澤之埤維廟食於百世皆功德菟於祀典
非若倚草附木徒禍福於六時陵墓則有后妃脩嗣之
攢宮侯王君公之塋碑朱少章之節旄已落馬三寶之
壺蜂不飛和靖贊寧花翁紫芝皆炳乎山靈水秀之潛
輝四聖顯應報陰相於中興三茅表忠見闡靈於內向
安晚峙上清之下初陽臺玉清之上雲濤靈曜崇真希
夷明真神仙雖藏幽占爽隱顯乎此湖要不若佛寺蘭
若後先乎重山複水之廣松門九里袁公是崇七峰兩

澗靈隱在中秀石奇木靈泉怪峰兼幽人禪衲之盛將
互見於累代能言之鉅公捷筌有三連薨接壩觀自下
而中而上始王圉而臻大士之宮神檜重榮御梅猶紅
草堂繞枕流之翠香林挂古藤之虹禮寶掌而登天巖
瞻珠鬘而下乳峰前生仙而廣利後月桂而洪鐘圓覺
藏思陵之宸靈芝抱越王之弓遡雲扉之幽窈撫靈石
之玲瓏現長耳之妙相演句麗之慈風南屏列家人之
象瑞龍谿奇觀之胸五百應真萬鈞巨釜畫廊絢日鐵

塔插空惟淨慈為南山衆刹之宗瑪瑙而坡鳥巢而叢
佛三寸不為小樓十三以龕其像佛百丈不為大舟萬
斛以維之蹤借竹智光埽缶中庸惟壽星為北嶺叢林
之雄豈唐朝四百八十猶有存者而宋興幾三百載損
益其中樓閣則豐樂中峙據湖之會叢以亭榭附以闌
闌魚莊曼衍柳洲縈帶竹山城而可眺迎光雲而不礙
清曠專負山之羨先得俯近水之快紅梅閣於孫沔綠
竹閣於居易巢居塵杖於屏下四照插峰於鏡外外如

延賓望海蓬萊雲漢正遍海會顧層見迭出之多而半
為白鵲青鸞之所蔽復有如虹者六御筆仰題西泠處
士宛武揚髻斷橋非荒蘚之舊長橋有古木之依琮老
金佛節奔泉之所發行春合澗條衆壑之攸歸餘則凌
金跨玉斜斜整整將舉趾而皆迷其或男羣女袿東游
西汎畫舫蘭舟輕舠巨艦各標令名明淥清泛金勝小
而善疾寶瓶大而宜緩明玉坐百客而有裕總勝列四
筵而才半賞心汎綠百花望月皺綠翻篙流蘇馳慢坐

若室處行若物換值御舟之游幸從水嬉之宣喚前金
吾而不禁後天香之拂面鱗如翼如恍衆星拱辰於天
河之畔非萬斛之能擬豈千丈之為箕別有龍舟兩兩
鼉鼓馮馮花帽表於御愛繡袍見於神歌陳百戲於水
面豎六標於湖心參前兩後三令五申觀者舟兩行如
廣陌迓者錦萬竿如長林五步一亭酒旆茶棚笙歌沸
騰軒鞅紛紜柳行撲地花陣排雲校門秋千出沒乎翠
圍舞衣歌扇周旋乎香塵新路習金雞之路祠山迎寶

馬之羣目不暇瞬步不得循想見進魚羹之宋嫂猶多
呈鶴舞之優人翦羅釘採花之籃範飴為穿柳之鱗飾
木兵於小桁串家具於修筠篙夫激半空之霹靂紙爲
競九天之經綸柘彈象弩畫棍髹盆羅韞凌波金釵照
春時固多攬紅拾翠之子亦豈無尋幽討勝之賓此特
言萬一於春九十之辰薰風動絃清和云始粲裏湖之
杭林拂夾塘之荷翠紫鴈瞥過白鷗乍起早崔祠之初
度正盾日之方熾水鏡濯髮冰山厲齒移舟南向攜衾

夜艤無人世之熱惱有月宮之寒意豔麗見於水如見
於仙醲鮮取諸舟如取諸市秋容不淡拒霜已紅映後
開之萼萼雜戰水之游龍剖霜柑於驄轡簪露菊於船
篷西山賦紅葉之句南山酌紫萸之鍾北風戒寒城人
簡出肉輦酒船亦無虛日延祥之紅白梅城吳阜之高
低雪域寶騎躍長隄而蹴瓊瑤慢車穿名園而擿珠璣
是蓋四時之景不同亦各以見賞心樂事之不一爾乃
既聞遨娛之盛請言風土之美水憑山而甘潔土得湖

而豐泥崧菑取種於茗雪蓮芡移根於檇李紫芋青菰
白藕紅芡文危章鷗黃雀錦雉魚甜蟹香筍鮮芹脆松
杉檜柏參朮蘭芷實鍾此湖山之秀故無物而不備矧
佳氣之磅礴至人材而尤異所謂傭兒販婦涵冰玉之
不翅况彼都人士褚陶杜栖之文行全琮許遠之忠義
元絳唐肅廣思惠於民人伯玉君復抱孤貞於林翳褚
氏世濟其美於大唐錢氏開國承家於五季顧歡郎蘭
之豈弟羅隱楊蟠之峻烈豈工詩而已矣惟此人物之

盛不可殫紀方外則郭文王復馬湘潘閬管歸真之流以發揮其英聲法照贊寧道潛清順抱一子之徒以陶寫其清氣時人但知游觀之可樂而不知景物緣人之可貴且自有天地即有此湖羣峰注流底而成澹尚念東漸於海鹹惡所濡草木齧餘而色變山川薄久而氣殂所以消沮沈昧之不已雖有此湖而如無於是築而防之使涇渭各得其所浚而闢之俾鳶魚各遂其初風無大浪雨無奔湍將翔將翔以佃以漁以此知古人有

功於此水將舉一朝而利萬世以無餘何寶正以還六
龍南渡搜勝挾奇重丹疊素致洞心駭目之觀非晴光
雨色之故彼徒知歲增侈而月益奢至以釜銷金之為
喻殊不知神京不返憂勤聖宇千官展轉而擇棲萬姓
彷徨而懷土故思極耳目之娛而為安旦夕之具不然
中原豈無黃河泰山之雄觀花石艮嶽之奇趣日月云
邁襄回瞻顧嗟居人游女不能不及盤游無度之歡而
志士仁人不能不興宴安酖毒之慮

游湖後賦

有序

元白珽

三月廿又三日張鵬飛及楊萬里李和之白廷玉汎湖
值雨各賦詩一首萬里曰隄柳春濃萬綠垂開懷消得
好風吹絕憐白也詩無敵共賞坡仙雨亦奇興欲狂時
呼酒急境當佳處任船遲豈無顧陸丹青手畫與人間
後世知余戲作小賦云


柳絮化萍濃綠藏鶯不見其處止聞其聲此豈非春工
之極致歟湛然宴坐輕舟自行萬姿千態遠山縱橫透

疎簾而濕衣忽驟雨之若傾甬下矻而閉戶才頃刻而
復晴白子酒稍酣矣奮鬣而慷慨曰此何為者邪悟慘
舒之不常於是誦趙抃表忠之奏歌蘓仙薦菊之章彼
割據於五季若錢氏之數王渺丘壟之無跡愴松楸其
可傷涸銀海而出金盃穴狐兔而上牛羊豈不亦雄傑
一時兮終若雍門之泣孟嘗賦梅處士妙解影香骨可
以腐千古不亡鬱孤山其碑兀擁萬樹之青蒼罔蔗節
之遺恨保故封猶若堂天道茫茫一雨一暘榮悴隆替

柔剛微彰謂偶然不足芥蒂兮曰作善降之百祥謂理
有必可恃兮曷顏天而蹠長二客方李遨頭目張嘖無
故而多事掇陳迹而揣量指金叵羅其猶淺兮舉大白
而罰之觴白子曰不然老陰為六老陽為九老則必變
如屈伸肘惟知變者可與長久知六之變固乃可守知
九之變健不為首顧此湖中之舟與舟中之人寧常壽
而不朽能畏謹以自修庶吉亨而无咎幸乘時而過分
負且乘兮致寇環綽約之蛾眉佩金印而如斗管絃沸

其前後紫緋奔其左右一旦不能自保率同歸於石友
蠹苗竄於三危防風橫於九畝曾不見或裸體以罩魚
或跣足而踏藕倖帶索之榮公甚泥塗之絳叟立層冰
而弗寒野茹僅其適口無樂亦復無憂不自知其不偶
豈不勝於孟晉而疾顛者乎此莊子所以不為廟犧而
李斯所以憶上蔡之狗也舟且抵岸悉闢其牖賦詩各
成肴核再取有化而無無化而有雨晴晴雨紛糅結糾
斯時也度夕陽猶未至於酉多言數窮姑相與大笑盡

樽中之酒



御定歷代賦彙卷二十七

欽定四庫全書

集部

御定歷代賦彙卷二十八

詳校官檢討臣劉 圻

主事銜臣徐以坤覆勘

總校官編修臣王燕緒

校對官中書臣嵇承志

謄錄監生臣李維瀛

欽定四庫全書

御定歷代賦彙卷二十八

地理

溫泉賦

有序

漢張衡

陽春之月百草萋萋余在遠行顧望有懷遂適驪山觀
溫泉浴神井風中鬱壯厥類之獨美思在化之所原感
洪澤之普施乃為賦云

覽中域之珍怪無斯水之神靈控湯谷於瀛洲兮濯日

月乎中營蔭高山之北埏處幽并以閒清於是殊方跋
涉駿奔來臻士女曄其鱗萃紛雜沓其如烟亂曰天地
之德莫若生兮帝育烝民資厥成兮六氣淫錯有疾癘
兮溫泉汨焉以流穢兮蠲除苛慝服中正兮熙哉帝載
保性命兮

湯泉賦

宋 秦觀

大江之濱東城之野有泉出焉直回峰負深谷分埧引
源迤邐相屬晨夜有聲涵雲注玉薄為虎鬚沈為魚目

鱗介莫潛遇者斯浴此何水也哉野老告余曰泓泓涓涓莫虞歲年不火而燠其名湯泉嗚呼豈非熒惑莅於上邪燭龍隱於中邪旁通咸池日御之所經邪幽精沉魄陰償其負邪丹砂硫黃金石之氣酷悍之所激邪德有常仁惠公而決寒凝海兮不冰旱焦山兮不竭其或燥濕外干精氣散越膚萃瘡瘍僊筋淫血欣滌汨之暫游恍幽憂之永脫以沐則髮澤以類則齒潔其支流旁浸捐棄於溝壑者猶能灌蔬稻之畦已平原之喝沾漑

何其廣邪吾聞天下之水厥類實繁至於弱水儲陰投羽必沉火井萃陽爛石灼金祥標醴泉病飲而瘳異紀滋穴神漢以流焦溪乏胃蔓之飾沸潭謝聳聆之游其餘酒墨所發膠鹽是滋啜懷千金飲狂一國哀玉乳以中涵橫金絲而徑度詭品繆名紛莫為數咸受命於元精亦各私其所遇若夫匡廬汝水之旁尉氏驪山之下煙菲掩縟王孫鳥隼之所娛金穴椒房專寵靡曼之所占則湯泉之中又有顯晦者焉野老听然而笑曰善乎

齊給之士曳杖而去行歌於塗曰澤沸滂沱奮此泉兮
被彼山阿吾唯盥沐兮不知其他

神泉賦

有序

晉傅咸

余所居庭前有涌泉在夏則冷涉冬而溫溫則水物冬
生冷則冰可以過每夏遊之不知歲之有暑耳

惟茲神泉厥理難原在冬則溫既夏而寒混混洋洋載
清載瀾遂乃壇以文石樹之柳杞密葉雲覆重陰蔽沍
氣泠泠以含涼風肅肅而恒起於時朱明紀運旭日馳

光鬱鬱隆暑赫赫太陽盥玉體於素波身淒焉而自清
不知天時之有暑忽謂繁霜之隕庭逮至旻秋既逝司
寒騁節六合蕭條嚴風凜冽河洛輟流太陰凝結彼澹
澹而含凍此灼灼而含熱綠竹猗猗荇藻青青是託斯
茂是植斯榮

靈泉賦

有序

唐
李德裕

予林居西嶺平壤出泉廣不逾尋而深則盈尺自東鄰
故丞相崔公至谷口故丞相司徒李公凡別墅五六皆

謂之平泉實發源於此觀其涌不騰沸淡然冽清冬溫
夏寒明媚可鑒其靈泉之蘊也予往歲獲戾放逐再罹
謗傷泉必變色久而後復昔傳長虞庭有涌泉以其色
在夏則冷涉冬而溫乃為神泉賦况潛靈蘊異美過神
泉因效長虞所作偶成此賦

山下出泉厥壤非石隨淺深而見底實秋毫之可析其
瑩若纖埃之映琉璃微蟲之潛琥珀玉瑕瑜而不掩鏡
妍媸而盡覲且夫動則廣大止則虛明如君子之抱德

乃望表而見情發源而東百谷皆盈既處高而就下雖
遇坎而亦平曩者方騁康衢俄驚覆轍泉色暫晦含晶
不發又如塵掩懸黎霧昏秋月累夕而翳盈旬乃澈爾
其脉引清泚環匝荆扉淪漣寫照物色殊暉孕蘋藻為
瑤碧涵沙磔為珠璣厯長坂而璘爛度小山而雪披若
乃砥石於宇析波自島入虛白而逶迤浮縹清而繚繞
氣潤蘅蘭色滋松篠含逸響於桐林動孤光於溪鳥於
是列植芳菊華豔芊緜漬漪瀾而更馥搖霽景而相鮮

葉凝夕露叢靄秋煙美楚人之餐英慕胡公之飲泉况
復自亭徂溪夤緣數里懸瀑溜於碧潭散浮湍於清沚
乘鷁舳以晨泛聽菱歌而夜起見蒹葭之始香疑湘沅
之在此重曰原隰既平泉流既清三逕未荒萬木向榮
感棣華之零落愴時鳥之相鳴恐閱水今日逝且歸來
兮養生

蒙泉賦

唐
李程

蒙彼東山山下有泉運未逢於畎澮色空積於澄鮮虛

明可鑒澹泞自然宜習坎以為德胡止艮而莫前士有
酌而歎曰惟水之義萬物之利顧尊達之或闕將灌注
而奚遂朝宗路阻未歸朝夕之池潤下功微空浸尋常
之地且夫壅則止理則通能致遠邇任決西東荷四氣
之平均潛生麗藻處重陰而蒙蔽尚隔清風亦有舒女
化而稱異耿恭感而成功彼皆因人而有託此獨居然
而在蒙懿其滿而不盈卑以自處岷山未測且覩濫觴
之時滄浪是期終異濯纓之所性則全柔德無與儔能

載清而載濁諒可泳而可游將注江湖終有希於上善
未分涇渭誠無惡於下流嗟止水之奚匹念發源兮在
斯當其一勺而可挹豈待成川而後知儻理水之有便
諒餘波而可期他日敢以勝載之力冀裨舟楫之時

雙漢泉賦

以泉澄水激蛟
鏡春冬為韻

唐王潭

呀厚地而濫涌者有河東之漢泉拆陰開竇沃日浮天
初汨沒圓衝拂高端於桑祗之下復逶迤遠注散餘波
於馮夷之川為神龍窟宅之上而致美為陰陽蓄洩之

所而通玄將海日泓沔而昭此豈坤儀挺拔以隳焉來
何所以去何所止始開雙漢發輝於汾魏之郊竟助洪
流歸潮於渤澥之水借如夜色初升空光下凝繁星映
而珠滿新月入而鈎澄洎乎風駭霧勃煙涌雲蒸則有
鬼神倏閃以怳忽蛟螭鼓怒以噴騰異物之與詭怪孰
可得而備徵意以為潛虛洞決胍流派別雖一河有隔
終陰隲以相連故數眼分開涵碧虛而共潔是以百尺
澄兮四空晶珠胎明兮沙岸皎洗拂煙埃蕩漾魚鳥亦

能涼生朱夏氣暖玄冬守謙下以含道順畎澮以利農
道則以物為賓水則假利於春人有情於利水水無意
以求人人之自偽我豈非真故至人以水為德以心為
鏡鏡雖明不利於人故澆之為澤也廣泉之為鑒也淨
若壅而閉則澤不能及物混而濁則鑒不能自正故選
士者象清澆以含虛懷才者但明心而未映苟能酌憲
於茲泉則可以相鹽梅而翼聖

娥女泉賦

有序

唐
李蒙

泉在寧陽城南二里古老傳稱娥女美容色善歌舞度
曲此地化為泉生於巖石間垂灑如淚故云耳

水之裔巖之偏嬾彼娥女瀏為沉泉伊昔巧笑淑靈濃
華豔色頰脣發而寥亮素袖盤而掩抑故能傾北方掩
南國超俗絕世神窮化極於是淒兮雨濕黯兮雲沉銷
玉貌與紈質冶瓊姿及蕙心舞成水態歌入流音臉眇
眇以波盡眉娟娟而月深觀其岸草翠積崖苔綺映列
山光以汎豔懸樹色而涵靜引耀冰玉貞明石鏡能含

上善之心不改至柔之性若乃蠲祀典戒良辰蘋藻前
奠笙竽下陳莫不淋漓玉集滴瀝珠新聲鳴咽而成韻
淚闌干而向人及夫嚴風歲晚熾景炎節水壯河沉流
枯海絕則必濕溜冬汎寒光夏冽異黃泉之下冥殊遊
水之東閱噫化將云盡奚假物而獨靈道或既存雖得
仁而何懟靡度可持安知榮悴望神光兮水潛鑒化跡
兮山閔寥杜若以誰與弄潺湲而增思

舒姑泉賦

以記云舒氏女
化為泉為韻

唐
浩虛舟

漂水之上蓋山之前昔有處女化為澄泉瞻風而豔色
如在責實而寒流宛然原夫曠別幽室暗悲韶年顧容
華之莫守望世人而都捐儼弱質以徐來顏猶灼灼委
貞姿而色動聲已涓涓眷戀無心淒涼故地念嬋娟之
可惜驚變化而殊異俯視清流託誠幽意陳翫習而斯
在庶精魂之能記素鱗赧尾渾非舊日之容急管繁絃
徒盡平生之志既而水府潛處幽冥既分凝情而淑斂
寒色冶態而波生細文泛浮影於中流遙疑娟娟逗鳴

端於別派遠若云云由是鱗甲與遊綺羅長阻迷綠沼
之迴復忘紅樓之處所源通湘渚寫幽恨於靈妃流達
漢皋導春心於游女淨色含虛清輝皎如煙凝淚以香
起苔爛斑而錦舒浦水光搖似動橫波之末岸莎風靡
如存鬢髮之餘想夫紈質已銷陰靈未謝濯衣彩於花
晝洗鏡光於月夜泠泠不濁殊畫地而俄成滴滴無窮
類拜井而潛化且靜而清者水之宜柔而順者女之為
憶朱顏之婉婉柔碧溜之逶迤浮沫粉聚懸流淚垂泛

萍藻而翠翹零落動菰蒲而綠帶參差及夫亂草丰茸
古墟荒毀雜泥沙之汨沒蔽音容之妖靡至今閭里之
人空傳其名氏

廬山雲液泉賦

有序

唐
吳筠

筠所居之東嶺其側有泉洪纖如指冬夏若一山少凡
石至多雲母其水色白味甘且滑此則雲母滋液所致
因名雲液之泉乃結宇其旁引於軒廡之下既飲既漱
永翫無數今茲夏季不雨至於十月江湖耗井澗涸此

泉泠泠不減乎昔懿其若是爰以作賦

坤元孕氣潛暢成泉冠五行之首為萬物之先爰有清
泚出此山側處蒙險以難知猶井渫之不食我搜靈泌
載披載登見其地僻至潔源深有恒凝寒不為之損暑
雨不為之增乃考室以飲而樂在枕肱甘侔玄玉之膏
滴乃雲華之液疚可蠲生可益引充狎翫惟意所適懸
之則素皎壅之則澄碧晝浮光以悠揚夜含響以淅瀝
陰陽為災水旱失節不雨災夏暨乎玄月汪汪洪波久

已竭耿耿瀑布今已絕挫江湖之浩蕩沉澗谷之微劣
斯泉秉彝毫纖無虧雖遠不需惠而近有所滋彼湍湍
於疇昔豈不慙涓涓於此時夫醴泉無源而易涸丹溜
乍見而難挹曷若止以為鑒酌焉取給何異神仙之瀛
帝臺之漿涌異域之表湛無人之鄉茲亦標奇於絕境
真可謂靈而長者也

望瀑泉賦

唐
李華

曙無雲兮川無波泛余舟於空碧彼廬山浮重湖之上

兮我極天之峻壁凝黛色之深明噫林嶺之岑寂何神
造之杳冥躍騰泉於山脊孤流皎皎於蒼梁翠淙千仞
兮懸帛玉繩絕於寥天銀河垂於廣澤春風雷兮篴霜
雪穿重雲而下射白龍倒飲於平湖若天地之初闢委
滔滔兮東迤詎知夫維今之在昔何倚高帆而一望豁
余心兮灑滌近古有鴈門上德兮昭洗塵昏柴桑間士
兮舍印推尊靈境殊象詮微究原人已古兮山在泉無
心兮道存將默貫於精極欲置之而不言

雙瀑賦

宋 王十朋

王子游簫峰之下訪鼻祖於仙籍駐杖屨於金溪觀雙瀑之千尺於時驟雨初歇飄風迅擊飛泉洶涌怒流湍激噴煙霧於蒼嵐吼龍虎於大澤百川震而澎湃萬類紛其辟易疑若傾崖轉壑變邱谷而為陵又類萬馬千兵奏鼓輦而赴敵久之狂潦微殺巨流順適靈源復尋於故道雙派交馳於絕脊勢偶殊而卒合路雖分而稍迫玉箸垂兮拂輕寒長紳拖兮蘸深碧疑若鯨鯢鬪怒

兮力未決而方酣千鎔爭鋒兮光交騰而互射嗟夫匠
之施巧兮作勝事於泉石顧一派之罕有兮豈雙流之
易得不見夫銀河落於半天兮破廬阜之山色梅雨飛
於石門兮敞芝田之靈蹟潭千丈於石橋兮渺仙凡之
路隔龍兩湫於鴈蕩兮分大小而異宅彼獨溜而孤飛
兮猶擅名於今昔況並峙而爭流兮作人間之連壁吾
欲窮千里之源兮問化工之始闢思漢使之不復見兮
悵靈槎之難覓獨終日而登臨兮寄吾懷於幽寂興雖

盡而忘歸兮猶待乎風清而月白於是目瞬飛流之末
耳洗寒潭之側思往事之微茫仰遺風而歎息竈中煙
冷難尋入竹之人峰頂臺荒不見吹簫之客賦罷乃歌
而歸曰雙瀑之水從何來靈源千尺高崔嵬飛流噴沫
飄瓊瑰空山落日鳴春雷有客來游獨徘徊枕流漱石
興悠哉塵襟濯罷飄然回風清月白空簫臺

天慶觀乳泉賦

宋

蘇軾

陰陽之相化天一為水六者其壯而一其穉也夫物老

死於坤而萌芽於復故水者物之終始也意水之在人
也如山川之蓄雲草木之含滋漠然無形而為往來之
氣也為氣者水之生而有形者其死也死者鹹而生者
甘甘者能往能來而鹹者一出而不復返此陰陽之理
也吾何以知之蓋嘗求之於身而得其說凡水之在人
者為汗為涕為淚為血為漉為淚為涎為沫此數者皆
水之去人而外驚然後肇形於有物皆鹹而不能返故
鹹者九而甘者一一者何也唯華池之真液下涌於舌

底而上流於牙頰甘而不壞白而不濁宜古之仙者以是為金丹之祖長生不死之藥也今夫水之在天地之間者下則為江湖井泉上則為雨露霜雪皆同一味之甘是以變化往來有逝而無竭故海洲之泉必甘而海雲之雨不鹹者如涇渭之不相亂河濟之不相涉也若夫四海之水與凡出鹽之泉皆天地之死氣也故能殺而不能生能槁而不能決也豈不然哉吾謫居儋耳卜築城南鄰於司命之宮百井皆鹹而醪醴漣乳獨發於

宮中給吾飲食酒茗之用蓋沛然而無窮吾嘗中夜而
起挈餅而東有落月之相隨無一人而我同汲者未動
夜氣方歸鏘瓊珮之落谷豔玉池之生肥吾三嚙而遄
返懼守神之訶譏却五味以謝六塵悟一真而失百非
信飛仙之有藥中無主而何依渺松喬之安在猶想像
於庶幾

後乳泉賦

有序

宋李綱

玉局翁作乳泉賦妙語雄辯不可跂及然理有未安者

梁谿翁作後賦以訂之其辭曰

客謂李子曰蘇子之賦乳泉也其言曰為氣者水之生而有形者水之死也死者鹹而生者甘甘者能往能來而鹹者一出而不復反也其果是也其果非也邪李子曰蘇子逞其辯說之雄詞語之工而有是言也揆之以理蓋似是而實不然也客曰願先生賦之李子曰唯唯盈天地之間為萬物五行最鉅而水其先也散而為氣者水之化聚而有形者水之體也其源必甘者水之本

其委必鹹者水之末也疑為霜雪噓為雲霧結為霰雹
融為雨露凡水之氣升於天者茲非其化邪發為井泉
匯為沼沚流為川瀆鍾為湖海凡水之形比於地者茲
非其體邪江河淮濟井谷之泉凡水之源未嘗不甘者
茲非其本邪滄溟之波斥鹵之地凡水之委未嘗不鹹
者茲非其末邪箕子之陳洪範論水之性水曰潤下自
其體言之也論水之味潤下作鹹自其末言之也因體
兆化則形可以變而為氣故水之升則為雲而雲之降

則為雨是氣形之初無二理也由末歸本則鹹可以復而為甘故海洲之泉必甘而海雲之雨不鹹是甘鹹之初無二味也請觀諸身水之在人為血血有形也流於榮觀則為氣血至鹹也發於漣乳則為甘至於涕唾涎沫亦然漱而鍊之氣灌五臟甘而不鹹由是言之蘇子以有形為水之死而以鹹為死之味一出而不復返也豈不過歟夫木無味也其末為實味斯酸矣火無味也其末為焦味斯苦矣土無味也其末為稼穡味斯甘矣物

成然後有味而未者其所以成也五行之理莫不皆然
何獨於水而疑之也客曰鹹者水之末而非其死則吾
既得聞命矣敢問泉源若一而味有獨甘者何哉李子
曰五行相生以金生水物得所生其出乃美故甚甘之
泉洞穴之下必有金錫以養之腐敗之井欲變其味必
資金錫以鎮之物理之自然也我卜我居梁谿之濱陸
子之泉天下所珍甘若牛乳錫山是鄰烹茶則芳釀酒
則醇可以佚老可以娛賓挈榼操杯酌冷嘗新繞齒頰

之清甘滌肺腑之埃塵析醒愈病益壽延年爰撫松而
嘯月遂拂石而眠雲優哉游哉飲水曲肱而枕之可以
養愚拙而全吾真

石門泉賦

有序

明

郭棐

夫君子矯時獨立斯能挽頽風而歸諸正昔周武王孟
津之師諸侯從者八百獨夷齊扣馬恥食周粟子輿氏
稱為聖之清足以廉頑立懦斯非獨立一時者與吳隱
之處默生晉之季時尚清談而行多穢處默為廣州

刺史酌貪泉以詠志卒之沉香於浦不易其操指盧循
劉裕為盜為篡歸而杜門甘貧不出屹然頽波之表真
不媿夷齊矣蓋夷齊憂萬世無君處默憂萬世無臣所
感不同其清忠不二則一也處默酌泉杜門之心即夷
齊不食周粟之心與然則謂處默為晉之夷齊可也予
乙未夏自滇南歸伏謁祠下時鄉士夫繕公祠新成少
參袁茂文業記之闡揚清節關於風教甚大予復表不
事二姓之心而賦焉

繫兩山之嵒嶠兮挺粵嶠之門屏傍有泉之涓涓兮噴
碧流之泠泠何昔人之盂浪兮羌汨之以汙名曰一畝
而懷千金兮豈知其源之深而清猗處默之瓌瑋而卓
犖兮抒淵衷於題詠爰大勺以引滿兮豈云遽移於吾
性維太一之濬潔兮掀朗照之如鏡詎波蕩之能洄兮
乃天君之素定嗟典午之不綱兮四夷擾乎中夏紛指
駿以為鹿兮漫以牛而易馬詫嶺海之遐裔兮金夫張
而廉貞喑啞漉流泉之在茲兮冒貪名而長夜噫吾心

之賦於天兮本至虛而至靈涵萬象而弗遺兮秉一介
以為貞豈因世之溷濁兮而能易吾之清明乃命酌以
自信兮洗茲泉之污聲時荻龍之弗慙兮挺戈鋌而作
孽焯焯臣衷於皎日兮唯矢貞而抗節哂么麼之匪茹兮
肆莽蠱之毒螫飲茲泉以自葆兮諒丹心之不易赫黃
堂之榮名兮儔不滋夫鐘鼎惟公志之澹泊兮僅一魚
而一茗即片香亦必沉兮汎桃花而晦映亮孤節之亭
亭兮超塵氛而守正晚退居於邱樊兮慨皇祚之凌夷

熒惑見於東井兮彗星埽於紫微
嗤太尉之跋扈兮歎世塗之嶮巇
竟憂憤以易簣兮終全身於義熙
偉亮節之磊落兮稱純臣其庶幾世
皆知公酌泉之清兮而不知殉國之
節甘鬻犬之艱貞兮蹈猶龍之巖壑
不委身於二姓兮媿夷齊之孤烈唯
不易於一心兮足蜚聲於萬葉亂曰
人臣之職兮清以成忠惟夷與齊兮
百世可風美哉處默兮良二千石一
酌流泉兮萬古為烈鬱彼孤貞兮不
事二姓憂憤以沒兮為臣之正粵山
龍從兮

粵泉泚泠先生之風兮山高泉清

游懸泉賦

金趙秉文

庚午之歲九月既望趙子與客遊於承天之廢闢置酒
乎妒女祠之側千山暮蒼素月如拭形與影嬉山谷互
答一談一笑超然自得既而歎曰泉下飛則無聲石不
聳則無骨山日秋而漸瘦境以夜而增寂四者備矣而
無勝因以文之境雖奇而不即於是剗蛇腹之枝以為
琴竅鳳膺之管以為笛誦王摩詰韋蘇州之詩所以侑

此觴而永今夕少馬動乎動息乎息鳴乎鳴嘿乎嘿入
吾耳者瀏以清歷吾目者森以屹金鼓半空聲在峽中
道孃子之關潘美所以下河東者邪旗幟盡拔春染木
末突井陘之口韓信所以破趙壁者邪迫而察之風落
山而泉鳴石也二客曰未也向者泉出祠下大如車輪
下赴絕澗懸流千尺殷晴空之雷霆飛炎天之冰雪六
年於茲而閔其澤子能酬而出之亦一段之奇特趙子
曰泉有時而通亦有時而塞豈我見聞有我同源動靜

致一反聞聞處聞所不及無聞之聞聞性不絕離見見處見亦不立無見之見見亦不滅今子以耳聽聲未能眼處聞聲以眼觀色未能耳處觀色故一泉之見為之惑也歸語同僚曰此殆維摩詰也覺而賦之但山高水深風清月白

觀泉賦

明邵寶

維暮春者二泉子步自廬麓觀泉於龍池既觀而憇於是賦之夫龍池之上中峰凌霄雙泉下垂名曰瀑布若

颶若颶若奔若馳浸星綴漢破雲截霓孰從而速孰阻而遲此天下之至奇也及其中也迴澗轉谷放乎至足强弩釋機輕車旋轂鯨舞於潮龍戰於陸千雷萬霆神藏鬼伏蓋吾聞諸古人至是而得寓目焉又其下也石壁四立淵淵其潭其廣可度而深不可探納之匯之其量有涵澄之而清酌之而甘清不可褻甘不可婪乃溢而流行徐百折陰洞之竇陽厓之缺逶逶迤迤滔滔決決吾嘗見其行而未見其輟也乃若日星開朗動盪元

精玉作之色金作之聲載歌滄浪以舒幽情厥或霧雨
晦蒙呼吸變化沉鬱而洩叫號怒罵大資經綸小入圖
畫一日之內四時之中東西南北隨觀異容發太極祕
妙地天通詰之莫辨測之莫窮非川上翁其將焉從邪
山僧執筆請書於石子何言哉一笑而擲

觀泉賦

明倪謙

當春日之載陽兮柳裊裊以垂絲暢冲襟以抒寫兮陟
層臺而自怡雲冉冉其出岫兮風飄飄而吹衣睠翠巖

之石罅兮縣瀑颯其雙馳恍銀河之倒瀉兮訝玉龍之
競飛神爽忽焉飛越兮人世沓然以如遺慨古今之禪
代兮少日壯而老以衰惟茲流之噴薄兮亘四時而不
移嗟人生其如寄兮徒擾擾將何為傷余懷以興感兮
足踟躕其忘歸

品惠泉賦

有序

明 徐獻忠

叔皮何子遠遊來歸汲惠山泉一罍遺予東臯之上予
方靜掩竹門悄詳鶴夢奇事忽來逸興橫發乃乞新火

煮而品之使童子歸謝叔皮焉

迺何子之特發探水穴於山椒挂清寒於齒牙訊老羽
於惠寮甘平雲之乳竇因起興於操瓢望徐子以馳神
出簡書於下曹侑以陽羨之珍穀雨之苗走奇芬於鼻
觀參春靈之上苞合二美於一旦嘉上善之無嘲如上
客兮在門赴靈修之久要發空濛之玄閔辟塵氛於有
巢爾則陶氏之鼎改餘之火既精滌盪遂集文武瀉玉
液於懸崖分小瀑之如布忽變紺寒蒸氣如霧覺蟹眼

之旋生復中起兮如破涌江潮於剎石沸溫波於洛浦
於是歸功茗事頌德玄溟出太素於碧落浮瑤光於上
清露華紛其秋澹佳氣鬱乎春明媚幽懷之無始眷高
况兮凌雲游玄神於顧渚追勝事於南泠興咄咄兮七
發心冉冉而獨醒劣山谷之雙井勝仙掌之金莖奔走
羣公逍遙竹門品上池之獨重追菊水於顏齡信馳心
於空灝無乃下甘露而清洪河也

濛汜池賦

晉

張載

麗華池之湛澹開重壤以停源激通渠於千金承渥洛
之長川挹洪流之汪濊包素瀨之寒泉既乃北通醴泉
東入紫宮左面九市右帶閭風周墉建乎其表洋波迴
乎其中幽瀆傍集潛流獨注仰承河漢吐納雲霧緣以
采石植以嘉樹水禽育而萬品珍魚產而無數蒼苔汎
濫脩條無幹綠葉覆水玄陰夾岸紅蓮煒而秀出繁葩
赭以煥爛遊龍躍翼而上征翔鳳因儀而下觀想白日
之納光觀洪暉之皓旰於是天子乘玉輦時遨遊排金

門出千秋造綠池
鏡清流翳華蓋以逍遙攬魚釣之所
收纖緒挂而鱸鮓來芳餌沉而鯪鯉浮豐夥踰於巨壑
信可樂以忘憂

小池賦

有序

唐太宗

許敬宗家有小池作賦賜之

若夫素秋開律碧沼凝光引涇渭之餘潤縈咫尺之方
塘竹分叢而合響草異色而同芳徘徊躑躅淹留自足
疊風紋兮連復連折迴流兮曲復曲映垂蘭而轉翠翻

輕苔而動綠牽狹鏡兮數尋泛芥舟而已沉涌菱花於
岸腹劈蓮影於波心減微涓而頓淺足一滴而還深於
時景落池濱霧黯疎筠卷舒澄霞彩高低碎月輪露宿
鳥之全翮隱游魚之半鱗岸隨年而或故流與日而終
新雖有慙於溟渤亦足瑩乎心神

小池賦應詔

唐許敬宗

臣忝班下列胥宇上京欣託巢之有庇體墀戶之全生
爰鑿小池依於勝地引八川之餘滴通三涇之洋溢慕

鑒止而端形乃游智而清志爾其潺湲繞砌激沒縈除
擬高陽而不足比蹄涔而有餘游瑩劒之微鳥躍露鼎
之纖魚乃若椅井傍通桃蹊俯映仰天津兮共澹潔秋
景兮俱淨倒列宿以疑珠含望舒而似鏡覩江使之潛
處翫波臣之沉詠於是翻光甕牖漾影蓬門溜激石兮
長嘯鳧鼓浪兮相喧竹凝露而全弱荷因風而半翻足
以漂瑩心神澄清耳目對昆明而取况喻春蘭與秋菊
不羨寶於河宗豈希大於暘谷彼瑤池之高醺固幽遠

而空傳此坳堂之信遠遂騰譽而聞天降臨渭之睿藻
連橫汾之曩篇何微生之一日荷大賚於千年

清泠池賦

唐王泠然

梁王既受封於漢命駕東游入睢陽之下國弔微子之
高邱榮華莫比僭擬無休復欲象昆明之校戰同右武
之習流決河間而飲馬治宮樹以維舟當時舊跡此地
爰修土木間成起臺宮而似畫絲金並奏和冰石而疑
秋是時宮人出看上客淹留既成此地勝形無比喬樹

青冥而外合層甍岌業而斜指曉生狎鷗春祠薦鮪連
小山而夾迴磴截長河而分半水徒觀其清冷無點洞
澈如凝鏡開珠淨月滉星澄鳬嚼紅藻龜翻碧菱地將
昏而霧合天欲雨而雲蒸明則可鑒虛而不竭風靜浪
碎日落圓折波含閣而相動潭映空而俱澈此土之池
君王所為年深則峴山陵變水決則滄海塵吹不見射
魚之浦空餘養鴈之陂皇家化溢成周包含梁宋分星
辰以主萬國會江漢而歸一統惟茲之地清而且平居

下流而不濁含上善而逾明常以柔而處順豈遺道而
從榮時人競渡揺海艦於三春暮客來投落江帆於四
岸何今日之登陟皆昔年之池館物是人非所存者半
濟巨川必待舟楫得風流還升汗漫儻餘波而可需幸
不遺於所觀

漲昆明池賦

以池滿春流思
衆河漢為韻

唐
張仲素

空闊靈沼蒼茫舊規昔穿馬迎秋而大閱戎艦今漲也
乘春而無竭陂池惟時陽候既序陰冰已泮天子乃詔

京尹以亢役命水工而叶贊陳衆力而雲鏞勃興決萬
派而箭流共灌澹汪汪之積水似耿耿之斜漢况復穀
雨初霽天桃正春總上善以利物涵聖澤之深仁軼彼
宮沼瀾如海濱鼓金隄之曲岸揚石鯨之彩鱗浪涌煙
郊更失辨牛之涖日華翠激纔分織女之津伊昔殊荒
未化勤遠是思非障澤之渚矣將水戰而肄之構館浮
鷁以遨以嬉獼獼呈形有類於文身之俗鳧鷖亂響如
習乎下瀨之師春水平兮波緩春日煦兮沙暖雖守柔

以易狎竟安卑而就滿重泉之沫騷騷而若迴淺汙之
毛離離而漸短至若鏡朗風收澄明不流沃餘潤於荒
野引孤光於釣舟豈獨鼈蜃是獻實亦龜龍載游厥跡
既往前聞可想故人遙集曾分劫火之灰蕃帥來朝暗
識滇河之象其漲則那式詠且歌開鄭白之墳衍流畎
澮以天波瑞氣長凝表宸居之在鎬晴虹乍飲若榮光
之出河大哉水之為量皆從夫一勺之多

漲昆明池賦

唐
宋
悛

於廊靈沼其流湯湯控清源於近甸澄積溜於方塘頃者天子時欲出池苑瞻農桑納獻可之規諫設成務之紀綱乃斬杞柳破隄防將欲抑耳目之遊觀資稼穡於人康一物失所若已納隍竭其澤則龜魚無咸若之地害於物則邦家無好生之方豈以成功者不可以適變識道者克在乎順常乃天意怡豫人謀允臧不遠而復載濬其隍亦既具畚鍤亦既瀦沼沚將挹彼而注茲乃引流而激水總括趣絕見鯨波之大來委輸成深覺鳧

舟之漸起且池之盈矣亦云自瀕修軌躅雖聞於仍舊
開汲引終期乎取新鱗介將枯而復躍草木咸滋而更
春皇矣我后有如其仁懿乎哉仰對一水旁連九陌流
惡有類於汾澮納汙頗同於川澤煙收霧斂混天色而
波清秋霽霜晴浮月華而影白載有菱芡羣浮羽翮將
飛有翼時棲太一之雲欲濟無梁幾滯壁池之客且流
謙者聞於善下惡盈者誠於自滿儻從事於水鑒庶可
形乎長短

曲江池賦

以城中人日同
集池上為韻

唐王 綦

帝里佳境咸京舊池遠取曲江之號近倖靈沼之規東
城之瑞日初昇深涵氣象南苑之光風纔起先動淪漪
其地則複道東馳高亭北立旁吞杏園以香滿前喻雲
樓而影入嘉樹環繞珍禽霧集陽和稍近年年而春色
先來追賞偏多處處之物華難及只如二月初晨沿堤
草新鶯轉而殘風裊霧魚躍而圓波蕩春是何玉勒金
策雕軒繡輪合合沓沓殷殷鞞鞞翠亘千家之幄香凝

數里之塵公子王孫不羨蘭亭之會蛾眉蟬鬢遙疑洛
浦之人是日也天子降鑾輿停彩仗呈丸劍之雜伎間
咸韶之妙唱帝澤旁流皇風曲暢固知軒后徒游赤水
之湄何必穆王遠宴瑤臺之上復若九月新晴西風滿
城於時嫩菊金色深泉鏡清浮北闕以光定寫南山而
翠橫有日影雲影有鳬聲鴈聲懷碧海以欲垂釣望金
門而思濯纓或策蹇以長愁臨川自歎或揚鞭而半醉
繞岸閒行是日也樽俎羅星簪裾比櫛云重陽之賜宴

顧多士以咸秩上延良輔如臨鳳沼之時旁列羣公異
在龍山之日若夫冬則祁寒裂地夏則晨景燒空恨良
時之共隔惜幽致以誰同孰見其冰連岸白蓮照沙紅
蒹葭兮葉葉凝雪楊柳兮枝枝帶風豈無昆明而在乎
畿內豈無太液而在乎宮中一則但畜龜龍之瑞一則
猶傳戰伐之功曷若輪蹄輻湊貴賤雷同有以見西都
之盛又以見上國之雄願千年兮萬歲長若此以無窮

鹽池賦

晉
郭璞

水潤下以作鹹莫斯鹽之最靈傍峻岳以發源池茫爾
而海渟嗟玄液之潛洞羌莫知其所生狀委蛇其若漢
流漫漫以潏潏吁鑿鑿以粲粲色皜然而雪朗揚赤波
之煥爛光盱盱以晃晃隆陽映而不焦洪濬沃而不長
磊崔碌碓鏹刻碁方玉潤膏津雪白凌岡粲如散璽煥
若布璋爛然漢明晃爾霞赤望之絳承即之雪積翠塗
內映潏液外翬動而愈生損而滋益若乃煎海鑠泉或
凍或漉所贍不過一鄉所營不過鍾斛飴戎見珍於西

鄰火井擅奇乎巴濮豈若茲池之所產帶神邑之名嶽
吸靈潤於河汾總膏液乎漚淩

鹽池賦

以天造靈物
資人食為韻

唐閻伯興

坤之美兮焉可以測鹽之池滌沆兮劃開於郇瑕之側
廓平陸而無際浸長天之一色前對條山照峰巒之截
聳却鄰安邑對城樓之巖岌其出形鹽也狀雄虎之蹲
於長野攫拏兮布護其吐精光也如白日之昇暘谷照
爛兮燿艷既似乎鏡湖之不遠又似乎渤海之在即是

以我良牧宣風千里褰帷憑軾覩茲池兮荷上天之報
覩茲鹽兮恤下人之食意者以為季布鎮乎股肱黃霸
蘊其輔翊不爾何魚鹽川澤之用饒土潤鹹鹺之利飭
天人之繫列則有典有孚百姓之攸迷而不知不識粲
矣郊甸丕哉庾億且觀其皎晶池濱皚峨嶙峋髣髴珪
璧依稀硤珉入澤遐窺喜晴天之速曙隔林斜望訝瓊
樹之驚春餌之者若茹膏之客捧之者疑獻玉之人况
生殊播植動必合時為諸侯之賞愛入嘉賓之賦詩嗟

乎其皎皎兮于川之湄其郁郁兮于川之坻有美玉之
價沉之而不污有君子之德湟之而不緇利入桓公之
論名留謝氏之詩充郡國之珍產實亭育之攸資永言
沉鬱必由光拂可取於人况鑒於物懿夫天不祕寶地
不藏靈可以和梅羹之調鼎致君於堯舜可以偶牯鱗
之入薦效祉於勲名爾河汾之寶信同天造豈若分溝
塍之綺錯則萬頃花明市井田之周環則千里雪皓由
斯言旃有美自天幸無委於泥淖將以報於陶甄

[illegible]

御定歷代賦彙卷二十八